

AUSPICIO ALTISSIMI,  
DISPUTATIO ETHICA,

De

VIRTUTIS MO-  
RALIS NATURA

*In genero,*

PIETATE ET JUSTITIA

*In Specie.*

In Regiâ Academia CHRISTINâ, ex con-  
sensu Venerandæ facultatis Philosophi-  
cæ Eruditorum censuræ  
submissa;

P R A E S I D E

M. AXELIO ANDREÆ K.

Botho:

R E S P O N D E N T E

GABRIEL & GREGORII ARCTO-  
POLITANO Finl.

Ad diem Novemb. horis locoq;  
consuetis. 1649.

A B O Æ,

---

Imprimebat Petrus Wald Acad. Typ. 1649.

S. & R. & M. tis fidelis riteq; constituto  
per Savvolaxiam Toparchæ, Tribuno  
quondam militari perstrenuo,  
*Generoso & Nobilissimo Domino,*

# DN. MICHAELI

## DE JORDANI

Hæreditario de Lacatis & Willia &c. Me-  
cānati meo & fautori ut faventissimo, ita  
quovis honoris cultu perpetim  
devenerando.

N E C N O N

Reverendis, Doctissimis atq; Humaniss: Viris  
DN. ANDREÆ J. KECKONIO,

Scholæ Arctopolitanæ moderatori  
dexterrimo.

DN. IACOBO B. LIGNIPÆO,

Ejusdem Scholæ Conrectori diligentiss:  
Præceptoribus ut quondam fideliſſ: Ita  
Fautoribus æternūm cōlendis.

Has Studi orum primitias non tam moris, quam  
honoris & debita gratitudinis declaranda  
gratia submissè & per officioſe inscribit, dicab  
& offerat

Gabriel Arctopolitanus

SECTIO PRIMA

De

VIRTUTIS MORALIS

NATURA In genere.

P R A E C R I P T A.

I.

**V**irtus est babilus electivus in me-  
diocritate quoad nos definita, pro-  
ut vir prudens eam definierit. Vel;  
est promptitudo agendi in homine se-  
cundum reclarationis normam, qui  
affectionibus tale injungitur modera-  
men, ut tranquillus & beatissimus,  
qui in hoc mundo haberet posset, sta-  
tus obtineatur.

2. Dividitur secundum gradus vel  
species.

3. Graduum intuitu virtus est vel  
enchoata, vel communis vel Heroica.

A 2

4. Spec.

4. Species sunt pietas & probitas,  
5. Oppositum virtutis est vitium,  
quod est deformitas & aberratio  
a lege.

E X P L I C A T I O N E S.

*Ad Præcepta in genere.*

**F**inis ut non possidetur nisi interven-  
tu mediorum; sic neq; Beatitudo si  
a virtutis segregetur consortio. Hus-  
jus igitur impræsentiarum sacra pera-  
genda; hæc jure meritò sub contem-  
plationem vocanda. Quid enim  
prius ducendum in rebus humanis,  
quid antiquius virtute? ad quam na-  
ti & conditi, cui servire unicè oportes-  
at. Lex imperat hanc divina: man-  
dat humana fulcro rectæ rationis sub-  
nixa: subiiciuntur huic cuncta.  
Quicquid homines arant, navigant,  
ædificant, Virtuti parent, ut seite Salu-  
stius magna hominis prærogativa est  
bona mens, magnum vestigal, Cy-  
no

nosura est, à qua si errat, periculose errat, à supermo scopo aberrat. Inutilis tum scientia omnis ac prudentia; inutiles dignitates & honores, imò noxij, & ceu gladius in manu furiosi, secreti à probitate morum. Quam si tollas doctrinæ succum in super omnem tollis & sanguinem, dignitatem omnem, quam ingenij gloria non agnoscit nisi virtutis stipata præsidio & comitatu. Ut enim auro à gemmas uus honos, sic studijs à virtute. Hæc amplum sibi thestrum est, pulcherrimaq; merces. Ad coetera si repexeris mandana, quid omnino illa si cum virtute componas; fluxa sunt & caduca, quid nisi fumus? Umbra? nihil? Una hæc temporum injrias nescit, fortuna assultum ridet, in secundis in adversis non colorem non animum mutat. Hanc ergo qui actuosam possidet, is felix, is beatus dici meretur.

### *Ad præceptum I.*

*Viuitus Cicerōi a viro dicitur quod viris maxime conveniat, in primis fortitudo*

quæ s̄pē per excellentiam virtus ap-  
pellatur ab Historicis. Alijs à virore sp-  
ellationem habet. Ambiguitatē sub-  
jecta materia de facili tollit; quid rei  
subsit dispiciendum. Binæ bic adfe-  
guntur definitiones, una Philosophi ve-  
tustior & obscurior non nihil; altera  
*Consultij Vexionij* recentior & clarior.  
Utraq; alti, discussa sibi facile constat.  
Virtutemelle habitum omnes saniores  
norunt; nec enim potentia est, nec  
affect⁹, ex quib⁹ nec neclaudamur viua  
perirem⁹, nec probi nec improbi reddi-  
m⁹; quod virtuti denegare iniquissi-  
mū force. ergo habitus erit seu prom-  
ptitudo quā in agendo determinam⁹  
ad aliquid sine difficultate præstan-  
dum. Est verò habitus electivus ut se-  
cerdotar ab habitibus intellectualibus, ab  
habitibus corporis actionibus itidē natu-  
ralibus, coactis, temerarijs ac fortuitis  
invitis. Formam Aristoteles in medi-  
oritate quoad nos definita ratione  
virti prudentis collocatam vult, nec  
ades iniusti, ut non nulli volunt. Mes-  
dio-

diocritas quippe & congruentia cū rectâ ratione adeo strictè cohærent & sororio quasi vinculo sunt connexa, ut unum sine altero nunquam esse aut existere possit; adeo ut si formam accuratissimè loquendo mediocritas non constituat virtutis; ejusdem tamen immediatum adjunctum & essentiale consequens sine controversia erit. Unde vel eō nomine locum in definitione sortiri non incommodè poterit, præsertim cum certum sit ejusmodi definitio, num formas non esse inusitatas. Masteriam ex qua virtus utpote accidens non agnoscit, materiâ in qua & circa quam non siccus ac alij habitus gaudet; bac affectus sunt quibus domandis & perdomandis, non plane averruncandas occupata est; illa est voluntas altera humani animi facultas, liberi arbitrij sedes & electionis mater. Finem, ut ipsa præstans est, ita præstantissimum acquirere tentat, S. Bonum & felicitatem, quæ in hac misericordia vallē mortalibus obtinere potest.

## *Ad II.*

Licet virtus in se & sua essentia  
specata non admittat intensiōnēm &  
remissionem & sic neq; gradus; ta-  
men contemplatione existētiae & pro-  
ut in subiecto recipitur, ad eius intro-  
ductionem & radicationem multa re-  
quiuntur, gradus admittere palam  
est.

## *Ad III.*

Tres sunt notabiles gradus sive  
respectus virtutum in uno subiecto:  
1. Est incipientium sive gradus continen-  
tiæ ad quem inchoata virtus refertur,  
cum affectus & cupiditates inordina-  
tæ masculè se opponunt rationi, nec  
pīni inveterè subjiciuntur. 2. est pra-  
ficientium & perfectorum dum pacatio-  
res sunt & magis repressæ nec ita vehem-  
entes, hac consumata virtus spectat.  
3. est Heroium & perfectissimorum, quā-  
do affectus ita dotti sunt & subjuga-  
ti ut vix aut rarissimè secesserant  
a dictatori opponantur.

*Ad*

## *Ad IV.*

Sufficientissima sunt hæc duo virtutis capita ad vitā beatam, quæ vel scriptura teste perficitur *veri Numinis cultu*, quem *pietas præscribit*; & *dilectione nostri proximi*, quam *probitas moderatur*. Huc etiam tendit Decalogi, qui Ethicæ divinæ compendium est distinc-  
cio in duas tabulas, quarum prior *precipit de affijs pietatis Deo*, posterior *de probitatis requisitis homini debitiss.*

## *Ad V.*

Non sufficit dixisse de naturâ so-  
lummodo virtutis, nisi & vitij foedi-  
tas simul distinctè tractetur. *Con-  
trariorum enim eadem est scientia*, teste  
Philosopho. Et quia mala sunt vici-  
na bonis, ne sub virtutis tegumento  
terrigenis imponant, applausumq;  
mereantur, vivis coloribus genius  
ejusdem etiam in Ethicis depingen-  
dus erit.

## *QUESTIONES.*

I. An virtus in hac vita cadat in  
hominem?

*Resp.*

*Reſp.* Licet obijciantur non pauca  
(quid enim est tam certum, quod ar-  
gumentis non poscit oppugnari) om-  
nes tamen cordati affirmant. Est  
homo capax S. B. & felicitatis  
ut alibi probatum, ergo & *mediorum*  
quorū beneficio beatitudinē sibi parat.  
Dantur in homine principia actionum  
*humanarum* virtuosarum, quid ni &  
virtutes? Et quorsū tot in sacris & pro-  
fanis adhortationes ad opera bona,  
instigationes & paroenes ad virtutes,  
dogmata de ijsdem, si nullatenus  
daretur in hac vita, Ut hic exempla  
omnium ætatum, populorum & nati-  
onum prætervehar. Nævi tamen  
qui cobæreant cum virtute etiam in  
sangissimis stolidi esset negare. homi-  
nes sumus non Angeli, depravatum  
usq; naturam circumferentes, ita scili-  
get nihil ex omni parte beatum. nihil  
tam magnificum & eximum in natu-  
ra, qnī sua patiatur deliquia. etiam  
optimis vina sua babent facies, celum nus-

*bos, & bonae mentis milles naufragia, optimus tamē ille & felix qui minimis urgetur.*

## II. An virtus sit habitus? Affir-

*Quid Bernardino Telesio, in mem-  
tem venerit, id neganti, non satis  
exploratum. Est qualitatem cer-  
tum est, nec ad ullam aliam qualitatis  
speciem referri posse quam primam,  
facile videt qui præconceptis opinio-  
nibus animum obfirmatum non habet  
& occoecatum.*

## III. An virtus homini sit natu- ralis?

*Resp. Seminariū, rudimentū &  
inclinatiō ad virtutem, homini inest ab  
ipsa nativitate: complementū vero &  
habitū perfectū exercitiō & actio-  
nū, frequentatione parari experien-  
tia firmat.*

## IV. An subjectum inhaesionis virtutum sit voluntas, an appe- titus sensitivus? Affir. prius licet

Licet ad appetitum sensuum aliquo modo pertineant virtutes, non tamen ut *adjuncta inherentia*, alias & brutis possint competere, quod oppido absurdum. *Voluntas* sola honestatem intendit, non sensitivus appetitus, eadem & virtus respicit. Ut intellectus post lapsum obscuratus suis indiget perfectionibus & habitibus quibus illuminetur & ad amissam sapientiam affurgat; Ita & appetitus hic rationalis opus habet adjumento, quo servos illatos rebelles, affectus & perturbaciones coercere & frœnare possit. Virtus deniq; est *habitus electivus, electionem vero in voluntate sitam esse*, sicut & libertum arbitrium nemo negaverit.

## V. Utrum forma virtutis sit mediocritas, an congruentia & conformitas cum lege?

Resp. Posse per mediocritatem re-  
clata ratione definitam, intelligi congruen-  
tiam cum lege, non adeo videtur ne-  
gandum. Nam lex cordibus nostris in

inscripta est illa prudentiae ratio quæ mediocritatem definit, cœsq; actionibus moralibus terminos præscribit citra vel ultra quos honestæ & virtutose non sunt. Interim nec diffitendum obscurius non nihil per mediocritatem indigitari formalem illam rationem: sicut & mediocritatem affectuum non ita dici potuisse & appellari *forma virtutum* Adami ante lapsum, nec beatorum in futura vita æterna, licet hic res tamen eadem sublit. Proinde clarius est assertere *convenientiam* cum lege in primis divina, sive conformitatem cum rectaratione, formam & intrinsecam essentiam constituere, hæc enim infallibilis regula ac norma est actionum humanarū, nec ex ulla alia regula pronunciatur ipse Deus de bonitate & malitia actionum. Unde & ad legem perpetuò hominem revocat, ut ex Mose & prophetis est videre. Ita & Iohannes peccatum definit ἀρπάγη h. e. transgressionem legis, tanquam regulæ & mensuræ omnium dictorum factorumq;.

**VI.** Suntne affectus omnes,  
quorum moderatione virtus  
occupata est, plane tollendi &  
averruncandi?

**Neg.** Indignus namq; est qui in  
humana societate toleretur, qui nul-  
lis omnino affectibus movetur h. e.  
qui nemini unquam irascitur, ne-  
nem amat, nihil odio habet, nulla re  
tristatur neq; latetatur, nihil timet, nul-  
lius miseretur truncusq; verius  
est & stipes, ad res omnes gerendas ins-  
eptus & infra bestiarum conditio-  
nem dejectus.

**VII.** Seqvuntur ne affectus tem-  
peramentum corporis? **Aff. D.**

Cum affectus magis sint homi-  
ni naturales & magis corpori immares-  
si quam mores, citra absurditatem ex  
temperamento aliquo modo deriva-  
ti posunt. Hinc sanguinei ad latiti-  
am & amorem procliviores, ad iram  
biliofi, ad tristitiam Melancholici,  
ad

ad metū Phlegmatici Hinc di-  
versos in diversis & climatū intervallo  
disjunctis populis deprehendim⁹ affect⁹,  
alijs ad scandaciam, alijs ad timorem  
inclinantibus. Interim inclinant affes,  
quis non necessitatis cum frequenti ali-  
as affectu & exercitio frenum  
sibi à ratione imponi patiuntur, ne in  
externum actum vel internum pro-  
trumpere queant.

### VIII: An in hominis non ren- ti arbitrio sit virtuti operam dare & vitium fugere?

Aff. Non de *Theologicis* sed *moralibus*  
virtutibus quarum principia etiam  
post lapsum homo in se habet, sāq;  
exercet sine *gratia* regenerante ut in  
gentilibus patet. Præterea de stu-  
dio virtutū Ethnici præcepta tradide-  
runt, ad cultum earundem excitarunt,  
pœnis etiam delinquentes coērcue-  
runt, quæ omnia frustra fecissent niū  
in potestate illorum obsequi esset.

IX. An pugna appetitus sensitivi cū ratione homini ante lapsum fuerit naturalis? Neg.

Exacta enim tum fuit omnium virium harmonia, nulla ~~disordine~~ qua  
lis pugna hæc. contraria enim est legi rectitudinem sancienti nati<sup>ur</sup>q; ex parte appetitus in vetitum, quod Deo placere haud quaquam potest.

X. Utrum homo proclivior ad virtutem quam ad vitia? Neg.

Longè plures *vitijs* deformes sunt, quam *virtutibus* exculti: Longè plura ad *virtutum* in nobis sunt invitamenta, quam *virtutem*, sensu enim grata & jucunda sequuntur, *appetitus* cum affectibus *delectabilis* deliderat perpetuò, undē & via facilis & præcessad *vitiā*, *virtutis* ardua & difficultis.

XI. An virtutes morales & Theologicæ seu christianæ different specie? Negat:

Iudicem quippe exprimuntur des- fini-

finitionibus tum *generali* tum *Speciale-*  
*bis*; eadem habent objecta, eadem ex-  
trema: & quod maximum est ead m-  
gaudent formâ specificâ, conveniunt  
enim in conformitate cum lege, qui  
igitur formaliter & intrinsecè differ-  
re poterunt? quamvis non negandum  
omne discriminem, *graduale*, si non  
aliud.

XII. An omnes virtutes sint  
connexæ ita, ut unam qui ha-  
bet omnes habeat.

*Resp.* Rigiidi satis sunt hoc afferen-  
tes. Et si enim talis *idea* concipi viro  
tuis possit & perfectio, ut in peculiari  
casu actus virtuosus omnium virtu-  
tum requirat concursum; non tamen  
unquam in hoc miseriarum ergastulo  
id ulli mortalium contingere credi-  
bile est. Exempla id confirmant  
evidenter. Una quis virtute est  
excultus vitijs mox scatet plurimi.  
Vitio quis obnoxius est unico vel plus  
eibus, virtutibus tamen excellit non

paucis. Hinc potest quis esse tem-  
perans licet sit timidus vel audax. Po-  
test quis fortitudine excellere, et si in  
temperantiae sit obnoxius vel avaritiae,  
est justitiae amantissimus & mansi-  
tudinis, quamvis omnes abliguriat  
possessiones & opes.

XIII. An unica tantum sit vir-  
tus?

Affirm. De unitate generica, speci-  
fica minime. Diversitas enim objec-  
torum & actuum circa distincta ob-  
jecta, ut & subjectorum secundum a-  
lios, varias etiam virtutes revera non  
nominatenus saltem, procudit.

XIV. An heroica virtus cadat  
in sexum fœmineum? Aff.

Quid est quod hic manifeste ex-  
perientiae obnuntatur? prostant ex-  
empla & sacra & profana: Deboræ,  
judith, Laëlis, Semiramidis, Elisabetæ Angli-  
æ, Isabellæ Hispanicæ, Amazonis &c. Et tū  
ad heroicam virtutem non tam fa-  
ciat natura, quæ etiam fœminis favet;

quam

quam extraordinarius rapitus & impetus  
divinus, nihil obstat quo minus &  
hic sexus in societatem hujus præro-  
gative admitti possit.

## XV. At danturne Heroes qui spurij?

Resp. Omnipotens. In sacris celebratur  
Iephia cui spiritus Domini dicitur ad-  
fuisse, in profanis Taemistocles, Thimo-  
theus, Romulus, Johannes de Austria, etc. Ex-  
cellentiæ causæ sunt partim *divinae*;  
De° enim ut excelsa depositit, ita humi-  
lia rursus extollit pro arbitrio, partim  
*naturales*; spurij namq; genitores non nu-  
quā validos sortiūtur vegetos & ma-  
gnam̄mos, undē & tales eundunt ipsi,  
*fortes generantur fortibus* & *bonis*; partim  
*Morales*, eluctari enim ē natalium ob-  
scuritate summo studio annituntur.

## XVI. Cur heroica ingenia quando impingunt, graviter impingunt?

Resp. Quia impetus herorum magis  
sunt & vehementes, & ut in virtute

communem sortem excedunt, ita &  
dum exorbitant, vehementius labun-  
tur alijs. In magnis & iram insuper  
occupantur, unde magis excidunt  
auis. Non leviter eadit, qui ex alto pre-  
cepit fertur.

## XVII. An malum morale ha- beat causam efficientem?

*Resp.* Distinguendo inter causam Efficientem in rigore & proprietate dictam, & communiter & in πλάτε & acceptant. isto modo efficiente destituitur, cum causa Efficiens sit Ens reale, quod non nisi Ens positivum producit: hec pacto conceditur dari efficientem; suos enim habent autores criminis & mala moralia utpote homicidii, adulterio, perjuria etc. & si sunt & perpetratur nec cessu ab aliquo patretur, quod ingenium omnino sapit causarum Efficientium.

## XVIII. Utrum virtuti vitium opponatur contrarie, an priva- tive?

*Resp.*

Resp. Utroq; modo, diverso tamen  
respectu. Vitium enim morale ~~commis-~~  
sionis (omissione enim alia est ratio)  
duobus modis consideratur: vel quo-  
ad formalem rectitudinis carentiam & a*lleg*-  
& i*ux*a*r* sola*conformitati d*recte* opposi-*  
tam; vel quoad totalitat*e suam sc*u* totum*  
complexum & aggregatum ex difformitate  
& actu; priori modo oppositio est pri-  
vativa, carentia enim rectitudinis non  
est nisi privatio: posteriori contraria in-  
super dicenda oppositio, cum nō nuda  
duntaxat privatio & defectus includa-  
tur; sed & actus qui contrarius etiam  
censetur actui virtutis per contrariet*em*  
tem inclinationum & actionū quae in  
virtutibus & vitijs oppositis præter  
privationem est conspicua. E. g.  
per fortitudinem aggredimur intre-  
pidē pericula, per timiditatem eadem  
fugimus martemq; in fugacib*us* pedis  
b*o* portam*.* per taciturnitatem arcana  
reticentur; per garrulitatem propa-  
lanter &c.

## XIX. An vitium formaliter sit aliquid positivum? Neg

O: enim En positiūm est bonum;  
Vitium formaliter nequaquam censuratur bonum. Ergo. Præterea O. En reale est à Deo, vitium sive & peccatum non est à Deo E. Deniq; Nulla caretia & privatio est quid positivū, vitiū formaliter est caretia restringitatis. Ergo.

## XX. In quibus se maximè exer- cunt vicia?

Resp. In plerisq; ijs, quibus perfec-  
tior virtutis gradus reperitur: quia  
bus plures delinquendi occasiones;  
quid & spes major imputitatis. Hinc  
tritum: Magistratus virum ostendit,  
& Tacitus: multi imperio digni visi essent,  
misericordia imperarent.

## SECTIO SECUNDA De PIETATE, PROBITATE & IUSTITIA In specie. pre-

Pietas est virtus, qua Deum ritè ve-  
neramur & colimus.

2. Aduersatur pietati Impietas,  
qua quis vel nimis supersticiosus  
est & extra mandatum divinum  
cultum sibi fingit; vel Deum  
plane contemnit & negligit.
3. Probitas est virtus, qua nos ritè  
gerimus in humanis.
4. Hujus variae sunt species, qua-  
rum prestantissima est Justitia,  
probitas suum cuiq; tribuens.
5. Estq; Distributiva vel Commu-  
nativa.
6. Distributiva in distributione bo-  
norum & malorum, premiorū &  
onerum secundum cuiusq; meri-  
tum occupatur.

7. *Commutativa in contractibus  
æqualitatem servat, & pœnarum  
irrogatione.*

8. *Oppositum Generali nomine dici-  
tur in iustitia, qua quis alteri non  
tribuit quod illi debetur, vel parum  
vel magis quam par est.*

### EXPLICATI O N E S.

*Ad præcepta in genere.*

**D**uo sunt præcipue quibus ceu vir-  
tutum omnia in circulo salus populi  
& fortuna Rerum pub. continetur: Pi-  
etas & Iustitia. haec enim utriq; potissima  
fulera sunt & firmamenta, haec geminæ  
quasi facies que aditum nobis parant  
sum ad hujus vitæ tranquillitatem,  
sum ad futuræ beatitudinem. Vis  
Nementibi facile & propitium, Pie-  
tatem cole, quæ conscientiam mentis  
regit, quæ caput & fons est omnium  
virtutum, Sal & anima omnis probita-  
tis. Vis benevolos bonos, cole iustitiam  
illam

illam refum divinarū humanarumq;  
reginam, quæ sanctione legum & jus-  
ris fundat humanam societatem. Si.  
ne quā maximæ opes ceu corpus ani-  
ma spirituq; defectum collabescant.  
Vis amicos utrosq; pietatem cum  
justitia conjunge & Deum & homines  
tibi devinxeris. Pietas virga illa Cir-  
cæ est, qua tacti homines mitescunt  
feritatem exuentes. Ruere omnia  
necessæ est ubi non hoc firmamentum:  
diffluere ubi non hoc coagulum: imò  
in criminum & scelerum i re licenti-  
am ubi non hoc repagulum. Justi-  
tia maximum & necessarium societa-  
tis & Reipub: bonum, sive quā nec  
civitas, nec universum genus huma-  
num, nec mundus stare potest. Vin-  
culum est per quod societas cohæret &  
Repub. nihil ipsa per se futura nisi  
onus & preda, si justitiam subtraxeris.  
Hos igitur virtutum inestimabiles  
thesauros effodere necesse est, effos-  
tos ad usum in vita traducere.

## *Ad preceptum I.*

Pietas ad omnia utilis est promis-  
fionem habens præsentis & futuræ  
vitæ dicente Apostolo, hanc qui virtu-  
tem esse negat helleboro opus habet,  
**Absolvitur primum cognitione & notis**  
a Numinis, **deinde cultu interno &**  
**Externo simul.** Internus timorem com-  
plectitur non servilem sed filialem istum,  
quo Majestatem divinam reveremur  
peccatumq; fugimus. Externus &  
Internus consistit in preicatione, qua ne-  
cessaria à Deo petimus; & gratiarum  
actione, quâ pro beneficijs exhibitis lau-  
dem debitam gratiasq; reddimus.  
**Exempla pietatis ut & impietatis tum**  
**Sacra pagina, tum profana historia**  
cum quotidiana experientia exhibent  
perplurima.

## *Ad III.*

Probitas omnes reliquas virtu-  
tes includit Ethicas, & cœn genus proxim-  
um de singulis prædicari nata est,  
liset hic perpetuò ea non serve-  
tur

eur & excep̄t̄or, hinc vir bonas & vir  
probas pari passu ambulant, Indigi-  
tantq; eum quem morum elegantia  
honestat. Objectum agnoscit homi-  
num, sive proximum sive nosmet ipsos,  
sicut pietas ad Deum refertur,

Ad IV.

Regina & domina virtutum' o-  
mnium merito salutatur justitia suffra-  
gij doctorum; præstantissima etiam  
non sine causa audit. hæc enim actio-  
nes nostras erga alios componit; hæc  
dissipatos homines congregat, & con-  
gregatos servat; hæc omnibus pro-  
dest, & quantum in ipsa omnes homi-  
nes & universum mundū servare alla-  
borat. Definitur per probitatem seu  
proximum genus. Differentia ex  
officio ejusdem desumpta. Dividi  
alias in universales & particulares  
solet: hujus mentio fit in præceptis,  
Universali ad quæstiones reservata.

Ad V. VI. Et VII.

Fundamentum divisionis mini-  
strat

strat objectum diversum & proprie-  
tates. In distributiva res sunt communes ad o-  
mnia membra communitatis quā talia  
spectantes<sup>9</sup>. Commutativa objectum  
constituant, commercia, permutationes,  
contractus non sicut teri & quasi cons-  
tructio, sed & obligationes tam quæ  
ex delictis, quam quasi delictis uar-  
scuntur. Distributiva proportionem ser-  
vat Geometricam, quæ æqualitas est ra-  
tionum: Commutativa Arithmeticanus, quæ  
æqualitas est differentiarum qui tere-  
mini ut hic sunt ab Ethicis usurpati ita  
paucis delibandi, quāquam non adeo  
referat eos hic apponere, cum obscur-  
iores esse constet.

## QUÆSTIONES.

### I. An de pietate in Ethicis in- culcandum? Affir:

Ethici quippe est omnis virtutū ha-  
bere rationem, qui ergo pietatem, quæ  
virtutum omnium fons & origo est,  
insuper habebit honestatem sestatim

Ethi-

Ethicus in omnibus hominum actionibus, quibus in Deum conversis, turpitudini immersas esse, nonne religio ipse esse debet? Ad finem insuper Ethicæ seu vitam beatam maxime confert pietas, quod igitur jure suib' huius disciplina exterminalia? Affectionem qui pietatem discit non illico virtutem denegabit esse. In forum Theologicum profsus rei scienti cognitio Dei naturalis refragatur.

## II. Sed daturne præter Supernaturalem aliqua cognitio Dei Naturalis?

Resp. Afferit id disserit Apelles ad Rom. 1. & 2. Cap. consentiat testimonia paganorum certissima & elegantissima. Hinc universa naturam in μακρυκόσμῳ quā μακρογήσμῳ idem testatur, unde illud: præsentem loquitur qualibet herba Deum. Imò principium est: Deum esse, nobiscum natum & satum.

III. An omnis timor Dei Virtus  
sit? Neg.

Est timor quidam filialis laudandus  
& bonus; est & servilis vituperandus &  
malus. Unde & quidam timidi ab Io-  
hanne Apoc:12, ver:8. accensentur in-  
credulis, homicidis, scortatoribus &c,  
quibus pars assignata dicitur in stagno  
ardenti. Hic timor homines à Deo ab-  
sterret, quò & primi parentes per-  
culsi à facie Jehovæ fugerunt & se oc-  
cultarunt.

IV. Estne imprecandum proxi-  
mo, vel diris devovendus ini-  
micus noster?

Resp. Negat id Sacra pagina dum be-  
nefaciendum inimicis imperat, nec  
malum pro malo rependendum. Be-  
nedicite, inquit os veritatis, ijs qui exe-  
crantur uos. Benedicite, infit Apostolus  
¶ ne imprecemini. Potior ergo no-  
bis sit scripturæ majestas, quam impre-  
cantium improba temeritas. Pro-  
phetas & sanctos qui amulari vult, vi-  
deat

dat ut Spiritum in primis prophetarum  
& Sanctorum possideat. *Duo enim*  
*eum faciunt idem, non est idem.* Hinc ex  
diritate imprecantium ipsis saepè authori-  
bus exitiosæ fuere. Prudenter iecir-  
co Sacerdos Atheniensium, justa im-  
precationibus & diris devovere Ale-  
biadem, respondit: precibus consti-  
tuta sum sacerdos non imprecationi-  
bus.

## V. Quid justitia universalis & quomodo à virtute discerni- tur. ?

*Resp.* Universalis *justitia* compre-  
hensiter dicitur *obedientia erga omnes*  
*leges.* Cumq; virtute universale lumi-  
pta retro commeat, secundum illud  
tritum: *Iustitia in sece virtutes continet*  
*omnes.* Unde mox consequitur reale  
hic discriminem iuter *virtutem* & *justissi-  
am* non haberi, *ratione* duntaxat differ-  
re videntur, dum *virtus* ad *habentem*  
*magis* referatur, & *possessorem* suum  
*perficiat:* *Justitia aliorum compeditati-  
bus*

*de magis velificatur, publico & private  
uui addicta. Unde respectum &  
ad alios habitudinem magis includit;  
non secus ac lex & præceptum virtu-  
tis, inter se collata.*

## **VI. An differt justitia vni- versalis à particulari?**

**Affir:** Discernuntur i. *Definitione:*  
*sila promptitudo audit, per quam legi-  
bus obedientia exhibetur, directione  
quadam iadifferenti ad objecta singu-  
lorum & commune bonum: Haec est  
constans & perpetua voluntas tribus  
endi cuiq; quod suum est in specie,  
quos d rerum distributionem & com-  
mutationem.* 2. *Objectis:* universalis cir-  
ca jus versatur, seu actiones virtutis  
quatenus justæ sunt & legibus confor-  
mantur, vel quod idem est: objecta si-  
gularum virtutum quatenus bonum  
respiciunt commune: Particularis in  
rebus externis occupata privata com-  
moda directe intendit. 3. *Finibus:*  
Justitia universalis præcipue publicum  
bonum

*bonum intendit & immediate. Particularis privatum maximè & proprium.* q. E: *tr: mis: illi adversatur in justitia universalis coagulum omnium vitiorum: huic particularis injustitia in distributione & commutatione cōspicua. Summa: Differunt fere ut genus & Species; formalis intercedit distinctio non realis.*

## VII. Quomodo differunt distributiva justitia & commutativa?

*Resp.* Potissimum ratione (1) *Debiti*, in distributiva traditur, quod debetur, non quod ante fuerit in possessione & dominio recipientis: Sed quatenus est pars communitatis. In commutativa redditur debitum, tanquam jam proprium applicatum & possessio alterius. (2) *Proportionis*, Distributiva observat proportionem, quam habet persona una ad aliam respectu rei trascendat; Commutativa non nisi proportionem & equalitatem rei reddite

& acceptæ. Unde in distributiva regnat proportio Geometrica, quæ personarum involuit respectum & ex meritò & dignitate cuiq; tribuit pro rata. In Commutativa, Arithmetica præcisè æ qualitatem mercis & pretij, poenæ & delicti intendens citra respectum ad personas.

VIII. An justitiæ actus proprius sit tribuere unicuiq; quod suum est?

Resp. Affirmativam magno conse n suntentur scolæ Ethicæ ex recepta & vulgata justitiæ *descriptione*, cui & suffragari fas æquumq; est. Licet enim & justitia actus inhibeat viciosos, furta, adulteria &c. cohibeat; nihilominus tamen & easdē rite tuerur partes, & suum cuiq; tribuit, malis poenam & bonis præmis. Quanquam & ad satisfactionem læso præstandā respect⁹ haberi possit.

IX. An omnia bona in Republica communia esse debeant?

Resp.

**R<sup>e</sup>s<sup>p</sup>.** Si Affirmativa vera sit tolleretur  
superior assertio: Ubi enim rerum  
omnium communio ibi meum & suum  
exulant. Platonis hoc fuit delirium  
sicut & Anabaptistarum hodierno die.  
Abolet hoc *contractus emptionis, venditionis,*  
*mutui &c.* Sacris tamen firmati  
literis, legibus & exemplis Sanctorū;  
ubi communio honorū nullus locus Ele<sup>s</sup>  
*emosynæ* quam Deus impetrat. Vana fos-  
rēt præcepta Decalogi vi. vii. ix. & super-  
vacanea; Virtutes justitia & liberali-  
tas exesse choro honestatis jubentur,  
ut alia silentij velo obtegantur, que fas-  
natica hæc judicia nullo refellunt ne-  
gotio.

**X.** An vindicatio, quâ delicta  
pro meritis corriguntur in ju-  
dice actus sit justitiae distribu-  
tivæ; Vel, an in poenæ inflicti-  
one propriè respectus sit ha-  
bendus personarum?

**R<sup>e</sup>s<sup>p</sup>.** Minimè gentium. Ad distri-  
butivam spectant ea quæ communis

sunt & distribuenda quidē civibus, quā  
pars communitalis sunt pro dignitate cu-  
jusq; personæ. Pœnæ verò nec sub  
distributionem cadunt, nec commu-  
nes sunt, nec esse debent omnibus ci-  
vibus quā cives, ut pecunia publica distri-  
buenda, præda &c. periculi sic plēa res -  
esset civē esse. Insuper pœnarum inflictio  
proportionem plane respuit Geometria  
cām, nec secundum eam irrogari pos-  
se constat satis superq; Cum sic in eo-  
dem delicto deprehensi nobilis & ple-  
beius, liber & servus, non obstante me-  
ritorum paritate, diversimode, iste a-  
crius hic mitius, punirentur. Plus e-  
nīm per proportionem Geometricam  
accipit nobilis quam ignobilis, plus liber  
quam servus, quod quam absconum sit  
nemo non videt. Fræterea iusta cen-  
setur distributio licet interdum, qui-  
libet non pro meritis de forse accipiat,  
modo ex summa dividenda & parti-  
unda pro loco & dignitate sua pro-  
portionaliter & respectu aliorum con-  
sequatur. Ita verò pœnarum irro-  
gatio

gatio nec fieri debet nec potest, semper enim pro meritis irreganda poena, nullo habito personarum respectu. qui si huc accedere interdum videatur, non per se id sit sed plane per *accidens*. Ministeriales hic iste respectus agit partes, in quantā circumstantia persona delictū vel aggravat vel elevat, nō infigendī actū primariō vel secundariō ingreditur. Suppliciorum civesitatem personarum proprius respectus, qualis in proport: Geometrica attenditur, non inducit, sed προαιρεσις & præsumptio major vel minor οργανώσεως ipsaq; culpa quæ ex hisce vel aggravatur vel elevatur.

## XI. Quid jus aut quotuplex?

*Resp.* Jus est norma agendorū & fugiendorū. seu est quod rectaratio faciendum vel omittendum prescribit. Dividiturq; in *Divinum* & *Humanum* Divina lex Moralem includit Cermoniale & Forensem, ut & jus naturale Philosophis & Theologis sic dictum. Itis jus omne est triplex *Naturæ*, *Gentis*

um & Civile. *Naturale* dicitur quod natura omnia animantia docuit. Unde Maris & Fœminæ conjunctio, sobolis procreatio & educatio deducitur. *Gentium jus* quod Philosophis *jus naturale* dicitur, est quod naturalis ratio inter homines constituit. Estq; *primarium* quod ex pura auit humana ratione, qualia sunt communissima ista principia omnium mentibus ab ipso ortu inscripta. Ut: Deum esse colendum, parentes honorandos, honeste vivendum &c. vel *Secundarium*, quod ex eis clusionibus per ratiocinationem colligitur. *Jus Civile* est quod civitas vel Respublica jus imperij habens fibi prescribit. Qualia jura in omnibus Rebuspubl: quæ non nisi Deum & Ensem superiorem agnoscunt, communi consensu feruntur & observantur.

## XII. An *jus brutis* competit?

*Rsp.* Si *juris propria ratio* spectanda non magis ea locum habet in brutis quam plantis, non enim ibi *ratio inter bonum*

bonum & malum distingvēns : neq;  
voluntas unum præ alio eligens, nec  
justitia moralis propriè suum cuiq; tribu-  
ens. At impropriè sumptum jus pro  
inclinationib<sup>9</sup> & operatio nibus quas  
communes cum brutis possidemus,  
quales vitæ defensio, conjunctio maris  
& fœminæ, procreatio liberorum, e-  
ducatio, appetitus libertatis &c. brutis  
bestijs tribui posse nō negādū, quomo-  
do & Jcti vocē juris laxius accipiunt.  
XIII; An jus naturale sit immu-  
tabile.

Resp. Quamdiu natura & ratio u-  
nica manet & immutabilis, tam diu  
& jus illud q;d ex incorruptis illis na-  
turæ principijs infallibiliter fluit & e-  
manat. Digito enim Dei cordibus  
humanis ab ortu ipso inscripta lex est,  
undē dcleri non potest, nisi ipsa na-  
tura vel ratio desinet esse ratio,  
vel ex male dispositi corporis com-  
mersio sui obliviscatur, ut in furiosis.  
Jus hoc in reliq; divinæ imaginis ha-

betur quis superesse bonitas creatoris  
esse voluit in natura, quam huc usq;  
conservavit & conservabit & nicens.

XIV. An leges civiles temere  
mutandæ?

Negat: Nec enim recedendum ab eo  
jure quod diu æquum visum est, cer-  
tamq; iemper interpretationē habuit,  
ne legum vis & robur Philosopho  
monete, quod ab usu & consuetudine  
sumptum facili mutatione, enervetur.  
Arguit præterea crebra legum muta-  
tio imprudentiam legislatoris qui quid  
è refuerit non facile perspicere po-  
tuerit. Authoritatem insuper Magi-  
stratus prostituit, inq; contemptum  
decreta vocat & adducit olim abro-  
ganda. Unde Reipub. metuenda  
convulsio. interim ubi necessitas &  
evidens utilitas mutationem impe-  
rant, nihil prohibet quin fiat. *Salus*  
*enim populi suprema lex esto.*

XV. Num judex, quoties judi-  
cat, secundum allegata & pro-  
bata

bata sententiam semper ferre  
debeat? Att.

Nisi id fieret plurima incommoda  
redundarent. Judex enim sub  
privata conscientia mantelo quidvis  
pro libitu & libitu contra evidentes  
probationes statuere & decernere pos-  
set; innocentem damnari, Reum &  
fontem absolvi contingere: sic omnia  
perverterentur iudicia, omnisque de-  
fensio & accusatio per libidinem ju-  
dicis enervaretur. Perpetuis agitari  
motibus Rempub. necesse erit, si nul-  
lus in testibus innocentiae praesidium  
haberet; si de innocentia triumpharet  
iniquitas.

## XVI. An volenti fiat injuria?

Resp. Trita est *negativa*; sed nec af-  
firmativa dissona veritati. Distin-  
gendum, videtur inter *injuriam latè* &  
*strictè* sumptam: illa est cum simpliciter  
aliquid infertur quod leges & jura pro-  
hibent à sciente & volente: hoc, cum  
insuper *in vito* præter meritum accidit

contrà fas & qvumq; Isto modo spectata  
tam injuriam volenti posse inferri nō  
inficiandum; licet hoc modo non  
item. si modo plenam integrām & ex-  
pressām habeat voluntatem, liberām &  
absolutam.

Sic Virtute, Pictate & Justitia,  
pulcherrimis virtutum apicib; specta-  
tis, huic discursui finem imponimus,  
Deum Ter O. T. M. devotè deveneran-  
tes, gressus nostros in virtutis semita  
dirigat, ne extra liras rapiamur pietati-  
ris probitatisve; sed hanc constater in-  
sistentes viam finem conseqvi media-  
tum & immediatum, i.e. æternam &  
temporalem felicitatem ritè valcam⁹.

## C O R O L L A R I A

Polit. Hist. & Theolog.

i.

**Q**uanquam liberum Religionis ex-  
ercitium armis justè defenditur;  
non tamen Religio, Spirituale quip-  
pe bonum, ferro & flamma propa-  
ganda.

2. Cura

2. Cura Religionis non solis in-  
cumbit Ecclesiasticis, etiam ad Ma-  
gistratum spectat Politicum, qui ca-  
put Regni & summus est Guberna-  
tor.

3. Religio Salvifica postquam de-  
fecit in posteris Magogi post tempora  
Siggonis, qui ad annum a diluvio re-  
gnavit 412. a condito mundo 2069.  
non prius reducta est in Regnum  
Sueo-Gothicum quam Anno Christi  
813. Biornonis IV. Regis Sveciae &  
Caroli Magni imperatoris temporis  
bus. Horrenda proinde idolomania  
hac Regna Borealia, ut & alia, circi-  
ter tria annorum millia, misere in-  
voluit.

4. Sveones suas ab initio habuere  
literas quas Runas vocarunt; verum

ante annos 648. Imperante Olae  
Sloffonung/ propter impia &  
Magica plurima ijsdem exarata, pe-  
nitus extirpatæ & deletæ sunt, non  
sine eximiorum, ut opinio est, docu-  
mentorum Regni & rerum memo-  
rabilium jactura insigni.

5. SveoGothi intra fines Regni,  
nunquam Imperatoribus Romanis  
paruere, ut ex arbitrio Cæsarum vel  
Reges acciperent, vel Majestatem  
possidereant.

6. Licet manu Regia primitus  
Regni administratio peracta sit; ve-  
tustas tamen legum Sveticarum ex  
Authoribus earundem & Instaurato-  
ribus patet.

7. Nobilitatem ramenta, rem  
fictam & præpotentū Civium cōmē-  
tū esse, quis cum Chrysippo adsereret?

8. Res

8. *Respectu præscientiæ divinæ,  
quæ exacta & infallibilis, omnia ne-  
cessariò fieri certum est.*

---

*Ornatissimo juveni,*

**DN. GABRIELI GREGORII**  
Arctopolitano, Virtutis & bonarum  
literarum studiosissimo de virtute  
publicè disputanti, discipulo suo  
perdilecto.

**G**A B R I E L ut dictus qui quondam  
a Numine missus  
Virginei partus, Nuncius aethereus.  
Roboris est nomen verbo vis eis  
theatrali  
Signatur, fortem virtus & alma  
virum  
Optat enim, qui se querat qui se colat  
ultrò  
Prosequi vigilet nocte dieq; stu-  
dens,  
Qualem te præbes dudum ornatissime  
noster

**GABRIEL**, ut meritò nomen &  
indè geras<sup>2</sup>.

Sicq; decet gnatum patris doctiq;  
boni q;

Patrizare, bonum & lætificare pa-  
trem.

Progressus largire precor Deus opti-  
me nostro

Discipulo, metam sic facile asse-  
quitur.

Honorū & amorū ergo  
L: M:q,

**M SCHILLUS PETRAEUS D.**

---

**O**nne tulit punctum, cui virtus arbitra  
vita,

Cui pietas cordi, qui probus usq; fuit

**GABRIEL** est tibi honor prestans, qui  
differis aptè,

Et simul his studcas, hinc tibi major  
honos.

Honori Ornatiss. DN. RESPOND.  
præcias accinebat amicè

Johannes de Jordan  
Nob: Fink:

Quid

**Q**uid GABRIEL signat, quæris  
doctissime frater?

Virtutem Jovæ, *Gabriel* ecce notat,  
Signat & hanc Jovæ virtutem, præstat  
opem quæ

Costrictis, gravitèr, sique; tuetur eos  
*Atque* tuetur ovans te, si re *Gabriel* esse  
Pergis & in verâ, si gradiere fide.

Adsit cuncti potens cæptis, det secu-  
la multa,

Quo *Gabriel* vivas, celis per astra  
poli.

Amico honorando  
applaudebat.

*HENRICUS IACOBI*  
*Finlandus.*

**S**i qui fæcundas proscindunt vomere glebas,  
Et sat agunt ventis linteas vela dare;  
Et si qui duri Martis retinentur in arvis  
Laudantur, magnis nominibusque cluent:  
Cur non qui Clarijs alacres lustantur in  
agris,

Prostilio vigili nomina magna gerant  
Ergo

Ergò tibi laudes referam mi Gabriel amplas,  
Pieridum studio quod teneare sacro.  
A puero semper Virtutis cultor avarus  
Et Pietatis amans fidus eī acris eras.  
Nunc narras Virtus quid sit, sub Preside  
Claro,

Quid Pietas, quis sit Iustitia eī vigor.  
Porro Virtutem, Pietatem dilige eī aliam,  
Virtutem magnam gloria magna mag-  
net.

Hæc Syncero appo-  
suit amico

JOHANNES TH. Wænerus  
Satakundia Finlandus.

GABRIEL Aonias quod potas impiger undas  
Discursus præfens monstrat aperte tuus.  
Virtutem quoniā sectaris, Justitiamque  
Cum Pietate doces; laus datur inde tibi.  
Sic porrò pergas Virtutis scandere culmen,  
Ut tandem latus, commoda mille foras,

Amico amando lubens  
gratulatur;

JOHANNES H. LILIU  
Finland,

